

空生大覺中（楞嚴經卷六，蕩益大師註）

【經】空生大覺中，如海一漚發，有漏微塵國，皆依空所生，漚滅空本無，況復諸三有。

【文句】此言現前一念大覺之心，本自豎窮橫徧，亦無橫豎之相可得，只由認悟中迷，方乃晦昧大覺之體而為十方虛空，是故虛空情量，生於大覺心中，不過如大海中之一漚發現而已，至於十方有漏微塵國土，又依頑空妄想建立，假說依空所生，則知十方依正，豈離我現前一念心性，是故若能直觀心性，俾此虛妄無名漚滅，則虛空情量，原自本無，況復空中諸三有國土眾生，而豈有哉。

（卷二）

【經】云何汝等遺失本妙、圓妙明心、寶明妙性，認悟中迷。

晦昧為空，空晦暗中，結暗為色，色雜妄想，想相為身。聚緣內搖，趣外奔逸，昏擾擾相以為心性，一迷為心，決定惑為色身之內，不知色身，外洎山河虛空大地，咸是妙明真心中物，譬如澄清百千大海棄之，惟認一浮漚體，目為全潮，窮盡瀛渤，汝等即是迷中倍人，如我垂手等無差別，如來說為可憐愍者。